

CONVIVENZA

Solidarità è in pled ester

PIEDER CAMINADA

Raquinta glied pli veglia da pli baud, aud'ins savens chaussas che tunan bunamain romantic. Per exempel co ch'ìls carstgauns stuevan bain lavurar grevamain, mo co ch'els chantavan da cuminanza durant la lavur sin il funs, uschia gieva tut in zichel pli tgunsch. Ubain co ch'ins seseva suenter la lavur sin il banc avant chasa e discurriva en in'atmosfera schluccada da quai e da tschai.

Taidlan ins dentant pli ditg quai che glied pli veglia raquinta, vegnan era las autras istorgias. Lura raquintan els ch'i deva era pli baud carstgauns che guardavan mo per els sez. Per exempel purs fitg bainstants che purtavan al plevon dal vitg avant il cult divin ovs, charnpiertg e liongias – sco ina spezia da commerzi da perdun per lur vita betg adina cristiana. E quai fertant che lur proxims parents na savevan betg co survegnir ensemen avunda da mangiar per lur numerus uffants. Mia sira barmiera raquintava pli baud adina puspè talas istorgias da l'Entlebuch. Ed i n'eran sappia Dieu betg cas singuls. Quai dei dapertut.

Tant mia sira sco era mes geniturs, ch'eran creschids si en relaziuns medemamain fitg modestas, raquintavan adina puspè dals onns da guerra pe-



sants. Surprendentamain na gievi ad els materialmain betg mender quels onns che avant ubain curt suenter la guerra. Insa gidava en la miseria – uschè bain sco ch'i gieva oramai. Da mia «nonna» è tradida l'istorgia ch'ella haja reparti en la Bregaglia maila a fugitivs fomentads ch'era atgnamain prevedida sco provisiun d'enviern per sia famiglia cun numerus uffants.

Sche quellas istorgias van a mai tras il chau, crai jau che solidarità funcziuneschia adina lura il meglier, sch'i va propi mal cun ils carstgauns. Vai ad els dentant (memia) bain, daventa solidarità spert quai ch'igl era gia adina: in pled ester. (E quai en il dubel senn dal pled.)

Nagut demussa quai uschè evidentamain sco la pandemia da corona actuala. Enfin avant pauc temp na savevan jau betg che viagnar saja in

dretg uman. Era la visita en in club tutga pretendidamain la-tiers. Ubain ir cun skis. «I na mida nagut. Il plaschair per la naiv ed il plaschair per la natura èn pli gronds. Qua na ma lasch jau betg restrenscher», ha ditg in pensiunist turitgais d'acurt en la televisiun – tuttina quant aut ch'il dumber da las infecziuns è en il mument. E sche Michael Bubendorf dals uschenumnads «amis da la Constituziun» di fraid sco in glatsch en ina discussiun a la televisiun: «Schizunt, sche 80 pertschient da la populaziun fissan morts dal virus, fiss jau cunter las mesiras», lura è quai be pli ina chaussa: tup e barbaric.

Tut quai mussa era che nus vivain apparentamain en in temp, en il qual i va anc adina (memia) bain cun nus. En il qual solidarità n'è per betg paucs in pled ester. Ed insatge, vi dal qual ils auters duain sa tegnair l'emprim, per plaschair. U en in'adattaziun libra d'in proverbi divertent, ma tuttina spiertus da provegnientscha nunenconuschenta: «Tuts pensan adina be a sasezs, be jau pens a mai.»

Pieder Caminada è creschi si a Glion en in ambient per gronda part tudestg e viva oz en il vitg rumantsch da Castisch.

La rubrica «Convivenza» cumpara anc enfin la fin da l'onn mintgamai il glindesdi en La Quotidiana ed en La Südostschweiz.